


## 01. IDANTIFIE

### NOU BANN SIB

Premie letap pou enn bon pledwaye se idantifie bann dimounn ki ena kapasite sanz sitiason aktiel. Sa letap-la li extra inportan, aköz li permet nou kone ver kisana nou pou tourne pou fer nou travay pledwaye.

1

Aprè ki nou'n fin idantifie sa bann group dimounn ek l'institisyon-la, nou kapav dres enn tablo ou enn graf ki permet nou konpran nivo linflans ki sak group dimounn ou l'institisyon ena, zot nivo l'inter, ek osi relasyon ki existe ant zot par rapor a size lor ki nou pe travay.




2

Analiz zot pouvwar pou permet nou idantifie kisana ena plis linflans lor bann desizyon, savedir kisana pou vinn nou sib prinsipal.

3

Atraver bann relasyon ki nou'n idantifie ant zot, nou pou gagn enn meyer lide de bann talians ki posib kre ek de bann group dimounn ou l'institisyon ki bizin mobilize an-priorite.




## 02. KONPRAN

### BANN SIB

Pou fer enn travay pledwaye ki efikas, nou bizin bien konpran bann dimounn ki nou pe sible ar nou bann demars. Bizin konpran zot bann priorite, zot bann kontrint ek zot bann pozision politik pou resi kre enn largiman ki konvink zot.

1

Sak group dimounn ou l'institisyon azir dapre bann faktèr spesifik: bann faktèr politik, teknik, sosyal ou bidzeter. Konpran sa bann faktèr derier zot desizyon la permet nou azir dan enn fason ki efikas ek evit bann blokaz dan nou diskision.



2

Souvan, sa bann dimounn-la pa bien konpran realite de bann kominote; nou pledwaye, alor, bizin inform zot, explik zot ek ofer zot prev lor valer de nou bann demars atraver enn lapros ki baze lor dialog.



3

Pou pli konpran nou bann sib, nou bizin fer resers lor zot bann pozision dan bann dokiman ofisiel, dan zot linteraksion ar bann media, dan fason ki zot inn vote pou bann nouvo lalwa, ou dan bann publikasyon lor internet, lerla koumsa nou pou konpran zot parkour.




## 03. ADAPTE NOU LARGIMAN

### DAPRE SAK SIB DE NOU PLEDWAYE

Nou bizin adapte nou largiman dapre bann priorite ek bann kapasite de sak sib. Kapav prezant mem size depi diferan lang pou ki li pli rezonn avek bann preokipasyon de enn sib spesifik de nou pledwaye.


1

Par exanp, kan nou koz ar bann reprezantan Minister Finans, nou kapav met lanfaz lor bann lavantaz finansie lor moyen ek long term de bann demars prevansyon VIH ek, kan nou koz ar kikenn depi Minister Lasante, nou kapav met lanfaz lor bann progre pou lasante.



2

Pou konsolid sa bann largiman-la, nou kapav montre zot bann statistik, bann prev ek bann temwani az ki sorti depi travay terin. Bann statistik montre ki nou bien konpran bann demars ki'n met ou pou met anplas, ek bann temwani az montre linpak konkre de sa bann demars-la lor lakominote.



3

Mem avek bann largiman bien solid, travay pledwaye la kapav pran boukou letan avan resi abouti a nou lobzektif inisial. Li inportan kontign rest an dialog ek kontign kre bann solision ansam pou ki travay-la avanse.




## 04. KONSTRIR BANN RELASION SOLID

### EK PREPAR NOU POU DIALOG

Bann bon relasyon ek enn bon preparasyon avan dialog zwe enn rol bien inportan dan sikse de enn travay pledwaye. Si nou prepar nou bien, sa permet nou ena bann dialog konstruktif, ranforsi bann lien ek, finalman, fer travay-la avanse ver nou lobzektif.

1

Bizin pran letan, asize-ekoute ek rest an kominikasyon pou resi kre konfians. Ena bann lesanz sinp me bien prepare ki permet nou batir nou repitasyon kouma bann vre exper dan travay ar lakominote.



2

Nou bizin bien metriz nou bann largiman, letan ki nou pran pou koze, ek nou bann lobzektif kan prepar sa bann lesanz-la, afin ki tou sa ki nou dir koeran ek indik bien klerman ki demars bizin pran.



3

Kan nou prepar nou bann lesanz, nou osi kapav konstate si li bon moman pou abord enn sertenn size ou si bizin rod lor enn lot moman pou koz sa.



## 05. SEZIR BANN LOPORTINITE

### POU FER PLEDWAYE

Bann desizyon depann lor bann moman kle. Pou nou, sa bann moman-la reprezant bann loportinite pou inflians bann desizyon ek fer progre avanse pou bann drwa ek lasante de lakominote. Bann loportinite pou fer pledwaye souvan swiv bann sik politik, bidzeter, mediatik ek institisyonel.

1

Par exanp, preparasyon bidze nasional toule lane reprezant enn loportinite pou fer pledwaye ar Minister Finans, tandi ki bann eleksion enn loportinite pou rant an dialog avek bann politisyon.



2

Bizin bien swiv laktialite nasional ek bann deba piblik ki deroule dan bann media ek lor rezo sosio pou resi idantifie bann loportinite pledwaye avan ki pran bann desizyon.



3



Sikse enn pledwaye depann lor enn melanz bann tipti demars ek bann demars ki pli lonterm pou inflians bann desizyon gouvènmman dan enn fason dirab. Se sa melanz demars bien sibla la ki kre nou stratezi pledwaye.

6 LETAP

POU ENN PLEDWAYE

NASIONAL

KI ENA LINPAK



Gid ki finn fer avek sipor :



Avek partisipasyon :



### KONSILTE GID PRATIK LA



Sa gid-la inn realize par bann plaider ki fer parti rezo Coalition PLUS dan kad projet Accès Santé 2.

### 3 PIEZ KI BIZIN EVITE

**Komite ekritir :**  
Ines Alaoui, Soufia Bham,  
Pape Abdoulaye Deme,  
Yasmine Boucetta, Débia Dia,  
Louis Gonzague Iranyumva,  
Abdou Ndéné Ndiaye,  
Samuel N'Guessan, Tanvi Ramtohol

**Komite reлектir :**  
Vincent Leclercq,  
Serge Douomong Yotta,  
Cheikh Mohamad Hafis Seck,  
Cécile Henriot, Emilie Monod,  
Rodrigue Amoussou

**Mizanpaz ek ilustrasyon :**  
Chloe Rioual

Pledwaye-la bizin konsantre li lor bann lobzektif ek pa pran par politik, afin ki li prezerv so kredibilite ek mintenir kapasite de bann lorganizasyon ek pledwayan dan zot bann demars mem kan ena sanzman gouvènmman. Kan nou gard netralite, sa garanti ki nou pledwaye pa pou fel si enn parti lopoizision eli.

×



✓



Pou tou demars ek stratezi de enn pledwaye, nou bizin analiz bann risk ki existe ek prepar bann mezir pou diminie linpak sa bann risk-la si kitfwa zot arrive. Si nou plann an avans, nou kapav met anplas bann stratezi ek bann mesaz kler pou evite ki bann deba piblik vir kont nou aköz reaksion de bann dimounn ki kont nou konba.

×



✓



Ena plizir group ek letap ki inplike dan prosesos pou pran bann desizyon gouvènmantal. Souvan, bann dimounn ki pran enn desizyon pa neseserman mem dimounn ki pou inpliment sa desizyon-la. Enn pledwaye efikas bizin pran kont sa kompleksite-la pou ki ena enn vre inplimentasyon de sanzman ki nou pe rode.

×



✓

